

Ra Sceiba

Sto an aron danoo ra elezios
chi de Comun ades i dà del TU e pi del VOS
i à tanto bisoin de calche voto
e i scomenza coscì a tin pagà un goto.

El pian regulator el drome, come morto,
somea ra salata che l é ades inze orto
cardon daverò che el no resuscitarà
solo ca de zento ane i lo aproarà.

Intanto però i m à daerto ra piscina
e coscì pó se fei un vanto anche Cortina;
r aga r é ciouda e l é tanto gran bel
no sofrirae el fiedo gnanche el porzel.

A Cinque Torri montade se pó 'sì
l é un inpianto dei pi bieì, ve l podon dì
speron che par colpa, scì, de ra corente
i no feje restà a pè ra 'sente.

Sceiba, bona sceiba
ce me disto ancora?
Asto algo de bon da me molà fora?

Dijon brae ai 'sogadore del Cortina
che i à vento el titolo Talian
i é serie chi de Gardena e del Milan
ma el titol l é nosc, scì, come prima.

Chi da Venezia i cardea che solo lore
i aesse el ponte de Rialto
el nosc "Rialto" invezze i l à inaugurà
vegnù come el Banbin, in vea de Nadà.

I prezie suposò l é senpre chi
agnó te paghes de manco, agnó de pi
ma zerto che una bona concorenza
fesc ben a dute e negun resta senza.

A propojito de ra Corsa dei Sestiere
ei da dì che meo d ancoi l ea senpre agnere
na ota i fajea i ciare tanto bieì
ancoi no n é pi nuia, ma resta i casunziei.

L é propio pecà che chera usanza
me lasce ades dute co na voita panza
se el Comun diasse nafré de pi
son zerto che i ciare tornarae a vegnì.

L'ea bel vede i costumes de na ota
el larin, i boschiere, dute cuante
ades se v'indrio invezze che inaaante
se vede che r'armenta r'è ormai móta.

Sceiba, bona sceiba
ce me disto ancora?
Parleme nafré del nosc paes
dime se el v'è mal o el v'è del ves!

On un Comun con tante gran ufizie
l'Ufizio Tecnico l'è al prin pian
no digo mia che i feje un gran bacan
ma dute disc: Speron che i no se stize.

Pi in su l'è l'ufizio dei jendarme
par talian, se disc, sarae l'*uomo d'arme*!
Ades invezze co ra radiolines
i scota duto con ra rees *soprafines*!

Ma no basta, vien su chi da Milan
par se guadagnà un bon toco de pan
i caza multes a destra e a sinistra
e guai a ti se te fesc na *svista*.

I è come ra fogores co ra matita
i scribe mile lires e i te r'è dita
i te disc grazie, dapò che t'às pagà
ma intanto i t'è (cemodo se dijelo?) ... ciaà!

Sceiba, bona sceiba
ce me disto ancora?
Asto algo de bon da me molà fora?

Inze un bar de Cortina l'è na badiota
no sei se r'è ruada ca co ra tradota
zerto che r'è ra lenga che no se ferma mai
spezie se chi che ra serve l'è boi jai!

I sarà tanto biei i tosc d'ancuoi
ma i no n'è che cuatro stanpioi
par el comedon che i alza senza misura;
del paes l'è na vargogna che fesc paura!

D'inverno spezialmente i è dute tanto grei,
i v'è benon coi schie, i maestres i sà da fei
inparasse un mestier nò, no se usa pi:
staron a vede in seguito agnó che i v'è a fenì...

Par fortuna che on ancora una bona istituzion
l é r Enoteca, par tante na consolazion
con un bon goto de vin, see ros o bianco,
te sos alegro anche se no t às zanco.

Sceiba, bona sceiba...

Ra Corsa dei Sestiere – 8 de febraro 1970